

MOVIMENT DEMOGRAFICH

## La popolazion de Fascia se smendra ence chest an

L bilanz del 2022 rua a 9910 e l moscia etres 46 sentadins de manco. La families à na media de 2,26 componenc e l 5,53% di sentadins i è foresc

### MOVIMENT DEMOGRAFICH TE FASCIA TELAN 2022

	Moena			Soraga			Sèn Jan			Mazin			Ciampedel			Cianacei		
	ic	eles	tot	ic	eles	tot	ic	eles	tot	ic	eles	tot	ic	eles	tot	ic	eles	tot
Nasciui	4	6	10	4	1	5	12	10	22	3	1	4	1	3	4	8	0	8
Morc	14	13	27	2	4	6	11	9	20	5	1	6	3	1	4	12	6	18
Vegnuite	41	43	84	9	16	25	43	54	97	10	19	29	9	10	19	16	22	38
Se n jic	31	58	89	7	5	12	54	46	100	13	11	24	3	11	14	35	36	71
Al 01.01.2022	1.257	1.311	2.568	358	333	691	1.768	1.779	3.547	291	297	588	345	359	704	887	971	1.858
Al 31.12.2022	1.257	1.289	2.546	362	341	703	1.758	1.788	3.546	286	305	591	349	360	709	864	951	1.815
Desferenza	0	-22	-22	4	8	12	-10	9	-1	-5	8	3	4	1	5	-23	-20	-43

L smendrament demografich va inant an do an ence te Fascia. Dal numer più aut arjont del 2015 con passa 10.100 sentadins, se è jic endò de beleche 200 persones.

Dai dac che, desche ogne an, ne vegn sporc dai responsaboi di ofizies anagrafics de duc i Comuns de Fascia, che reingrazion de cher, se veit che l an 2022 se à serà su col numer de 9910 sentadins, 46 de manco respet al an dant.

#### Più morc che nasciui

A desferenza del 2021, canche l scialdo naturèl era stat de segn positif, se pur per pech (+4) e l smendrament vegnia dut dai tramudamenc (-54), tel an tanche feni l è stat n gran smendrament ence tel scialdo naturèl.

Te dut l an ti 6 comuns de Fascia l è nasciù 53 picioi e l è mort 81 persones, con na desferenza de -28. Negatif ence l bilanz anter rué ite e se n jic: 292 contra 310, donca etres 18 sentadins de manco, che porta en dut Fascia a aer apontin 46 sentadins de manco.

#### I dac comun per comun

Desche se pel veder da la tabelle, l soul comun che moscia n (picol) scialdo naturèl positif l è chel de Sèn Jan, olache l è nasciù 22 picioi e mort 20 persones, che soma +2. Ciampedel con 4 nasciui e 4 morc l va fora dret, Soraga con 5 nasciui e 6 morc la è a -1 e Mazin con 4 nasciui e 6 morc a -2.

I doi comuns col scialdo naturèl più negativ l è Moena e Cianacei. A Moena la desferenza anter nasciui e morc la segna adertura -17, con demò 10 nasciui contra 27 morc; a Cianacei chesta desferenza la è de -10 (8 nasciui e 18 morc). A pesèr però amò più debel sul bilanz demografich de Cianacei l è l tramudament, con ben 71 persones jites fora dal comun contra les 38 ruèdes a stèr: 33 jent de manco, che somèdes ai -10 del scialdo naturèl porta Cianacei a n smendrament de ben 43 sentadins, se pel dir la gran pèrt del smendrament de la val. Moena ge va do con bon destach: demò 5 sentadins de manco dai tramudamenc (84 rué ite, 89 jic fora) che somé ai -17 del scialdo naturèl fèsc ruèr chest comun a -22.

#### SENTADINS DEL COMUN GENERALA LA FIN DEL 2022

	ic	eles	tot
Nasciui	32	21	53
Morc	47	34	81
Vegnuite	128	164	292
Se n jic	143	167	310
Al 01.01.2022	4.906	5.050	9.956
Al 31.12.2022	4.876	5.034	9.910
desferenza	-30	-16	-46

I tramudamenc ge porta 5 persones de più a Mazin e a Ciampedel, che i rua en dut respetivamente a +3 e +5, e i ge n tol 3 a Sèn Jan, che va fora en dut a -1. La maor desferenza en positif ti tramudamenc i la fèsc a Soraga, che con 25 persones vegnudes ite e 12 se n jites la rua a +13, che somà al -1 del scialdo naturèl porta a n bon +12 complessif. Soraga, che la è cresciuda ti ultimes egn, la è do a se arvejinèr a Ciampedel, enzeve Moena la seghita a calèr e del 2022 la è ruèda a aer giusta 1000 sentadins manco che Sèn Jan. Su

la rejons de chisc dac sarà da poder fèr vèlch riflèscion.

L balanzament su la desferenza de gener muda de pech: a la fin del 2022 te duc i comuns fora che a Soraga la eles è en maoranza, en dut te Fascia la femenes les è 158 più che i omegn.

#### La families e l foresc

Te Fascia l è na media de componenc de 2,26 persones per familia, no dalonc da la media nazioneala che la è de 2,17. L numer maor de

componenc l è a Sèn Jan, con 1470 families su 3546 sentadins e na media de 2,41 componenc. Soraga l à 2,38 componenc en media e vegn do Ciampedel con 2,25, Mazin con 2,23 e Cianacei con 2,22; ultima Moena olache la 1198 families à n numer mesan de 2,12 persones, sot a la media nazioneala.

Da dir amò che ben l 5,53% di sentadins de Fascia i è foresc. La perzentuèla maora è a Soraga col 6,1%, vegn dapò Sèn Jan col 5,8%, Cianacei 5,78, Moena 5,38 e Ciampedel 5%. Destacà l comun de Mazin, che con 22 sentadins foresc l rua demò al 3,72%. Per chel che vèrda la nazionalitèdes al prum post te val l è semper la Romania, dapò l è gropes de sentadins da etres Paijes più spartii per comuns: a Moena do i 59 rumeni troon 16 sentadins de la Macedonia del Nord; a Soraga 17 dal Pakistan e 8 dal Kosovo; a Sèn Jan do i 68 rumeni l è 22 persones dal Bangladesh e 18 da l'Ucraina; a Cianacei do i 31 rumeni l è 24 persones da l'Albania. Spartii fora mingol te duc i paijes l è ence i sentadins del Marocco.

Lucia Gross